

La BCG e las pendicularas grischunas lantschan in'acziun da bigliets

25 da zercladur 2020 – La Banca Chantunala Grischuna (BCG) e l'Organisaziun professiunala da las pendicularas grischunas (BBGR) lantschan in'acziun communabla: ellas regalan a las cumpradras ed als cumpraders d'in abunament annual d'ina pendiculara grischuna ina carta dal di supplementara. En quella moda fan ellas cuminaivlamain reclama per la stagiun d'enviern 2020/21 – en favur da tut las interpresas da servetschs turistics en il Grischun.

Cun la cumpra d'in abunament annual d'ina pendiculara grischuna senza reducziun dal pretsch (tariffa d'indigens), obtegnan las cumpradras ed ils cumpraders ina carta dal di supplementara. La carta dal di nunpersunala po vegnir utilisada la stad u l'enviern tar ina pendiculara grischuna tenor giavisch. L'acziun vegn pussibilitada da la BCG en il rom da ses project da giubileum #gkb2020 e dal chantun Grischun. «Cun l'acziun recumandain nus activamain nossa regiun per la stagiun vegninta. Sche las pendicularas vegnan nizzegiadas, profita il Grischun sco regiun turistica en pliras branschas», conferma il CEO da la BCG Daniel Fust.

Martin Hug, president da la BBGR, stima l'engaschi da la BCG ed il sustegn dal chantun Grischun. Pervia dal coronavirus quinta la branscha da pendicularas l'atun vegnint cun ina mancanza da liquiditad. La stagiun d'enviern 2019/20 scursanida e las venditas mancantas d'abunaments annuals durant l'entira fasa dal lockdown han chaschunà perditas da gudogn. «Cun quest sustegn vegn promovida la vendita d'abunaments e quai segirescha la liquiditad a las pendicularas grischunas ch'èn in motor economic. Ultra da quai procura l'acziun che possessuras e possessurs d'abunaments annuals visitian er autras regiuns dal Grischun e quai generescha puspè svieuta en tut il chantun», di Hug. Decisiv è era ch'ils clients fan cun la cumpra d'ina carta annuala in'empermischun da visitar regularmain il Grischun resp. las destinaziuns. «Sch'il dumber da las cartas annualas vendidas sa reduciss e cun quai er ils segiurns dals giasts, n'avess quai betg mo consequenzas per las pendicularas, mabain per tut ils furniturs da servetschs e per la populaziun indigena. Il bainstar da quella dependa fermamain dal turissem», cuntinuescha Hug.

La maioritad da las pendicularas lantscha ultra da quai ina garanzia da pandemia per las clientas ed ils clients. En cas d'ina segunda unda pandemica datti ina bunificaziun per ils dis che l'abunament na po betg vegnir utilisà. Quels dis pon lura vegnir tratgs a niz durant la proxima stagiun. Ina survista da las pendicularas che fan part da l'acziun chattais Vus sut www.graubuenden.ch/pandemie-absicherung. Resguardai las cundiziuns generalas da fatschenta da las singulas interpresas e las tariffas coordinadas.

Ulteriuras infurmaziuns chattais Vus sut www.gkb2020.ch/impuls.

Contact per las medias:

Banca Chantunala Grischuna, Medias & Investor Relations, Chascha postala, 7001 Cuir

Thomas Müller, thom.mueller@gkb.ch, telefon +41 81 256 83 11

Plutarch Chiotopulos, plutarch.chiotopulos@gkb.ch, telefon +41 81 256 83 13

150 onns Banca Chantunala Grischuna: Tut las infurmaziuns davart il giubileum da la BCG sut gkb2020.ch.

La Banca Chantunala Grischuna sin:

gkb.ch/medien | [Twitter](#) | [Facebook](#) | [Instagram](#) | [LinkedIn](#) | [Xing](#) | [YouTube](#) | [Flickr](#)

La Banca Chantunala Grischuna – il leader en il Grischun

La Banca Chantunala Grischuna porscha tut quai ch'i dovra per ina banca universala moderna – per persunas privatas, l'economia ed il maun public. La banca occupa 1010 collavuraturas e collavuratur (stadi dals 31-12-2019). En il chantun Grischun cun sias numerusas vals e pliras linguas è l'interpresa represchentada cun 50 agenturas, la sedia principala sa chatta a Cuir. La Banca Chantunala Grischuna è participada a la Banca privata Bellerive AG a Turitg ed a l'Albin Kistler AG medemamain a Turitg. En il resultat annual preschenta ella cun ina summa da bilantscha da CHF 28.5 milliardas in gudogn dal concern da CHF 185.5 milliuns. Il scrit da participaziun BCG è quotà a la bursa dapi ils 10 da settember 1985.

Termin

Rendaquint semestril 2020: 23 da fanadur 2020
